

: ⊠

Anwar Hamrouni

► To cite this version:

| Anwar Hamrouni. : .⊠ 2022. ⟨hal-03849170⟩

HAL Id: hal-03849170 https://hal.science/hal-03849170

Submitted on 4 Jun 2023

HAL is a multi-disciplinary open access archive for the deposit and dissemination of scientific research documents, whether they are published or not. The documents may come from teaching and research institutions in France or abroad, or from public or private research centers.

L'archive ouverte pluridisciplinaire HAL, est destinée au dépôt et à la diffusion de documents scientifiques de niveau recherche, publiés ou non, émanant des établissements d'enseignement et de recherche français ou étrangers, des laboratoires publics ou privés.

Copyright

تونس غدوة: نحبوها مدينة الذكاء المواطني

Anwar HAMROUNI, doctorant en cotutelle de thèse

Équipe de Recherches sur les Ambiances (École Nationale Supérieure d'Architecture de Tunis) / CRESSON (École Nationale Supérieure d'Architecture de Grenoble)

hamrounianwarha77@gmail.com; 0021624805083

اليوم أكثر من أي وقت، تأكدنا إنا نحتاجو للغة جديدة باش التصميم العمراني والتخطيط المستقبلي للمدن متاعنا ما يبقاش دراسات تتخدم في مكاتب مغلقة ولا حزمة من التقارير والدراسات المعطّلة بالإجراءت الإدارية المعقدة. ممكن حاجة مالحاجات اللي تخلينا نشوفو التكسير و التخريب في المنشآت العمومية، اللّي مهما تكون حجم الإستثمارات فيها (مالية،بشرية أو تقنية) ما تنجحش، هو الإحساس إنو المشاريع هذي أجسام غريبة لا تمت لواقع المواطنين وإحتياجاتهم بصلة. تقرّرت وتصممت وتبنات ثمّ تفرضت على المواطنين. الفضاءات العامّة، الساحات العمومية، حومنا وشوار عنا دعوة مفتوحة ودليل حيّ إنّو الخيارات الإستراتيجية والمشاريع العمرانية بمختلف أحجامها وأنواعها لازم تنبع من إحتياجات المواطنين وخصائص كل موقع.

المدينة تتعاش، تتقرر وتتصوّر هنا، توّا، مع المواطن وبيه.

إعتبار المواطن مجرّد مستهلك سلبي يساهم بدرجة كبيرة في خلق إحساس الإغتراب وعدم إنتماء حتى في الحي متاعو ويخليه يرفض وما يتقبّل للأسف، الأمثلة برشا وللساعة هذي مازلنا نعتمدوا في نفس الطرق والوسائل اللّي خلات التعايش المشترك في فضاء عمومي اليوم أشبه بامتحان يومي صعيب. مازلنا نحاولوا نفرضوا أمثلة نموذجية ونجربوا بأي طريقة إنّا نعتمدوهم في الشمال كيما الجنوب، على الشريط الساحلي كيما في المناطق الداخلية على إنهم وصفة رابحة. نسينا في وسط هذا الكلّ أنو فما خصائص جغرافية، مناخية، إجتماعية وإقتصادية تخلّي كل بلاصة فريدة من نوعها، غنية بإختلافاتها. القوالب الجاهزة التي تُعتمد اليوم لتخطيط المدن الجديدة أو إعادة تهيئة القديم منها، قتلت روح المدن، الذاكرة الشعبية وضعّف حسّ الإنتماء والهوية. الشيء اللّي ضعّف بلاصة المشاعات العمرانية في حياتنا اليومية.

طريقة التخطيط العمراني الحالية سببت تفسخ لكل ما ينجم يوّحد الناس ويجمعهم. مثال صغير، المدن القديمة كيما مدينة تونس كانت توفر تجربة حسية شاملة تمس كل الحواس؛ أصوات التجار و الحرفيين، ملمس الحجارة المستعملة في المباني القديمة و القاعة، روائح الجلد و البخور،الأشكال المعمارية المحلية، الألوان الخاصة بالمنطقة أو الجهة، نسق حياة مختلف، طرق تنقل مختلفة... في سباقنا وراء الحداثة و النجاعة التقنية، ضحينا بأشياء بسيطة في حياتنا هي المشاعات اليومية. كان من الأجدر تثمينها، تأطيرها وإدماجها في المشاريع الجديدة حتى نخليوها تتواصل ونجمعوا حولها المواطنين كمجموعة قيم مشتركة تربطهم وتوحدهم.

الحاجات المعنوية اللّي حكينا علاهم في مثال مدينة تونس بالإضافة الى كل ما هو تراث مادي من بنيات قديمة، ساحات عمومية ولات نقطة حيوية في معيشتنا اليومية، بلايص كانت شاهدة على أحداث مهمة وتاريخية كلّها تكوّن المشاعات العمر انبة

كمهندس معماري، مختص في التخطيط العمراني لكن كمواطن بالأساس نلقى روحي في وسط أفكار تنادي بالمدينة الذكية كحل لتونس غدوة. حلول تقنية متقدمة وشبه خيالية، تقدم علمي يخلّي أي حاجة عندها برمجية تتلهى باها وكل شيء مبني على النجاعة، الربح والتسويق. أكيد هذي نظرة مستقبلية تخلينا نحلموا ونطمحوا لبعيد. أما شكون يضمن إنّو التكنولوجيا هذي مش تكون سهلة الإستعمال، توصل للفئات الكلّ، تتقبّلها الناس الكلّ وخاصة تحترم الإختلافات والخصائص الكلّ؟ إنّا تحصروا فهم المدينة الذكية في الحلول التقنية والتكنولوجيا المتطورة والفعّالة، تقصير وتغييب لدور أهم عنصر في المنظومة: المواطن.

في فكري ومنظوري المتواضع، لازمنا نرجعوا لأصل الأمور للأساس متاع التخطيط العمراني، إلّي هو المواطن. من دون الوعي متاعو وتبّنيه للقيم التي توضع على أساسها أقوى البرمجيات مثلا فإنها تبقى مجرد أدوات. هذاكا علاش الذكاء لازم يكون مواطني قبل كل شيء.

من أبسط مشروع متاع تهيئة ساحة عمومية لأكبر مشروع عمومي ممكن لازم المواطن يكون الشريك الأوّل و مساهم في المشاريع هذي مش بإبداء الرأي فقط، أمّا لازم ترسيخ عقلية المشاريع التشاركية من مرحلة وضع البرنامج الوظيفي؛

تتشاور الناس الكلّ و نقرّر طبيعة المشروع اللّي ناقص في الحي وينّجم يحسنلهم من حياتهم اليومية؛ إلى المساهمة في وضع التصورات العامة و الخطوط العريضة متاع المشاريع في إطار جلسات عمل تشاركي يتقابلو فيها الأطراف المعنية الكل (مهندسين،سياسيين،أعضاء المجلس البلدية،جمعيات مواطنية محلية،شباب، أطفال، نساء، أصحاب الإحتياجات الخصوصية...) و يحاولوا يقترحوا و يتصوروا مع بعضهم عبر وسائل مبسطة و مفهومة من الناس الكل. فالكل معني، بلا إقصاء. في مرحلة أخرى، يمكن تشريك المواطن في عملية إختيار الشركات لإنجاز الأشغال ومراقبة تقدّمها بطرق رقمية تضمن شفافية العملية. أكثر من هكا، ممكن المسؤولين على المشاريع يخليو جزء من الأشغال مفتوحة للجميع. على سبيل المثال، إنجموا ندعيو متساكني الحي باش يختاروا ألوان المشروع الجديد و يشاركوا في أشغال الدهن،ممكن حتى بلوحات متاع قرافيتي و فن حضري. ممكن زادا نشركوهم في تركيب الأثاث الحضري من مقاعد ولوحات...

التشاركية ما تقفش هنا. حتى بعد تسلّم المشروع ينجم كلّ حيّ يحضّر وثيقة إستعمال مشترك وناس تتلهى بيه في إطار إدارة ذاتية ومستقلّة. التجارب في العالم عديدة وناجحة بدرجات متفاوتة. لكن المهم في المعمار التشاركي إنّو يضمن أوّلا تقبّل المواطنين للمشاريع هذي خاصّة وإنها هي اللّي إختارتها وعبّرت عن الحاجة ليها. و ثانيا، إحترام الخصائص المحلية، الإختلافات و هوية الموقع. والأهم في هذا الكلّ، نكونو نجحنا في تدعيم مشاعات عمرانية موجودة وكذلك خلق مشاعات جديدة حول المشروع. تشريك المواطن في كل المراحل من شأنها إنّها تحسسوا إنّو المشروع ملكية مشتركة تجمع الناس الكلّ وتخليه يستثمر فيه ماديا ومعنويا. تشوفوا المجموعة كصالح عام يجب دعموا والمحافظة عليه.

الذكاء المواطني ما يقتصرش فقط على المشاريع العمرانية التشاركية اللَّى هي مجرد مدخل في الحقيقة.

مدينة الذكاء المواطني هي مدينة حكمها محلّي تشاركي يعمل بإنسجام مع المجتمع المدني، إقتصادها مبني على عملة محلّية لدعم الإقتصاد التضامني وتشجيع النسيج الإقتصادي المحلّي من حرفيين وصغار الفلاحين، فلاحتها ترتكز على الحدائق المشتركة والفلاحة الحضرية لتحقيق إكتفاء ذاتي، صحافتها وإعلامها مواطني جمعياتي، التنقل فيها يكون عبر وسائل مشتركة صديقة للبيئة.

مناخ كيما هذا ما ينجّم كان يدعّم المشاعات العمرانية مادية كانت أو معنوية ويجسّدها في مشاريع فعلية واقعية تتطلبش برشا إمكانيات لكن إرادة مشتركة، إحساس بالمسؤولية المشتركة وبالقدرة على الإضافة.

ممكن زادا، لازم فكرة الذكاء المواطني تكون مشاع فكري.